

ոստիկանին եւ գտեալ համարձակութիւն առաջի նորա՝ չնորհիւ նորին արգելին զՀայս նաեւ յեկեղեցւոյն Բեթղեհէմի և յԱյրէն Ծննդեան, առին զբանալի հիւսիսային դրան, բարձին զկանթեղսն յԱյրէն Ծննդեան, և սկսան բռնանալ 'ի վերայ սեփհական վանաց նոցին կառուցեալ անդ 'ի Բեթղեհէմ մերձ յեկեղեցին. սպառնային նոցա չմտանել 'ի Ս. Յարութիւն, կամելով բառնալ զաշտանակս 'ի Պատանատեղւոյն, խափանել զպաշտամունս և զարարողութիւնս՝ զոր կատարէին անդ :

Տեսեալ Թէոդորոս Պատրիարքի և միաբանացն Հայոց զայս ամենայն դործս եւ զհամարձակութիւնս Յունաց՝ տազնապեցան յոյժ, և անկեալ 'ի դրունս այլազգեսց աղաչէին զնոսա ձեռն տալ ինքեանց և չկորուսանել զսեփհական իրաւունս ազգին. ապա չոքան առ դատաւոր քաղաքին, և գանկատանօք պատմեցին նմա զանիրաւութիւնս Յունաց, զի բռնարարութիւնք նոցին արտաքոյ էր Կայսերական հրամանին. զի կարգադրութիւնք սեփհականութեանցն Հայոց 'ի Ս. Տեղիս Կայսերական հրովարտակօք և վաւերեալ դրովք հաստատեալ էր. և զի վէճն Յունաց միայն էր ընդ Լատինս, և հրովարտակն դրեալ վասն բարւոքման վիճակի երկուց ազգաց էր եւ չգոյր 'ի նմա բառ ինչ վասն Հայոց. յետ ծանուցանելոյ զայսոսիկ՝ Թախանձանօք խնդրեցին 'ի դատաւորէն՝ դրել և ծանուցանել 'ի Դուռն, զի վերստին դարձուցեն առ Հայս զբանալի արտաքին դրան գերեզմանի Ս. Կուսին, կախել ըզջահս և զկանթեղս և մուծանել զամենայն սպասս եկեղեցւոյ, կատարել զպատարագս եւ զպաշտօնս ըստ նախնի սովորութեան՝ զորս խափանեցին Յոյնք, և տալ զբանալի հիւսիսային դրան Այրին Ծննդեան, որպէս ետուն Յունաց, եւ բառնալ զհակառակութիւնս նոցա որ վասն վանաց սենեկաց, եւ այլ անշարժ ստացուածոցն Հայոց 'ի Բեթղեհէմ. չխափանել զպատարագս և զպաշտօնս, զԹափօրս և զայլ ամենայն արարողութիւնս 'ի տաճարին Սուրբ Յարութեան, չբառնալ զաշտանակս 'ի Պատանատեղւոյն. չփակել զժրհորն անդ, չբռնանալ 'ի վերայ վանօրէնց Ս. Յակոբայ, Ս. Փրկչի, Ս. Հրեշտակապետի, և Ս. Յովհաննէս եկեղեցւոյ : Զայս ամենայն լուեալ դատաւորին